



UNIVERSITÄTS-  
BIBLIOTHEK  
PADERBORN

## **Arbor Vitæ Sive Vita Et Doctrina Christi**

Ex Quatuor Evangeliiis In Meditationes Quotidianas Velvti Totidem Ramos  
Distributa

**Illsung, Jakob**

**Dilingæ, 1693**

Meditatio CCCXIII. De Transfiguratione Christi.

---

[urn:nbn:de:hbz:466:1-60727](https://nbn-resolving.org/urn:nbn:de:hbz:466:1-60727)

fit hominis in Animam suam amor, ut pereat; odium, ne pereat. Si malè amaveris, tunc odisti: si bene oderis, tunc amasti. Felices, qui oderunt custodiendo, ne perdant amando.

## MEDITATIO CCCXIII.

### De Transfiguratione Christi.

Matth. 17. v. 1. Marc. 9. v. 1. Luc. 9. v. 28.

**PUNCTUM I.** Quia Christus Discipulos suos ad abnegationem sui & portationem crucis adhortatus fuerat promissione Cælestis Gloriæ aliquando percipiendæ, & à quibusdam etiam in hac vita prælibandæ; dixerat enim apud Matth. c. 16. v. ult. *Amen dico vobis, sunt quidam de his stantibus, qui non gustabunt mortem, donec videant Filium Hominis venientem in Regno suo*; ideo *Post dies sex* (non computatis diebus, quo hoc dixerat, & quo hoc impleverat, quos S. Lucas computabat, & proinde dicebat: *Factum est autem post hæc verba ferè dies octo*) *assumit JESVS Petrum, & Jacobum, & Joannem fratrem ejus, & ducit illos in montem excelsum seorsum* (qui communiter censetur fuisse mons Thabor in Galilæa, ex quo descendens ipse, & Discipuli, teste Marco c. 9. v. 29. *Pratergrediebantur, id est, perambulabant reliquam Galilæam, donec venerunt Capharnaum*) *Et transfiguratus est ante eos.* Matth. 17. v. 1. Considera, Christum non omnes Discipulos, sed tantum illos tres duxisse in montem Thabor, quos secum assumpturus erat ad montem Oliveti: ut ostenderet, visiones, prægustationes Gaudiorum Cælestium, & Solatia Spiritualia, non omnibus Servis DEI communicari, sed illis, quibus vult, quando vult,

vult, & quantum vult; unde hos extraordinarios Favores DEO committamus: nos contenti simus, Servos & Discipulos Christi nos esse, & communibus Beneficijs frui; specialibus verò Gratijs ac Favoribus qui magnis DEI Amicis conferri solent, indignos nuncenseamus; ideo non nisi ante eos transfiguratus est Christus, qui prius *seorsum* de vulgari vitæ Sanctitate *in montem excelsum* sublimis Perfectionis ducti sunt: & qui ad majorem etiam Dominicæ Passionis in monte Oliveti communicationem & participationem tristitiæ disponendi & præparandi erant. Quemadmodum S. Paulus dicit: 2. Cor. 1. v. 5. *Quoniam sicut abundant Passiones Christi in nobis, ita & per Christum abundat Consolatio nostra.* Quòd si vis hanc abundare, velle debes, ut etiam illæ abundant.

PUNCT. II. *Et resplenduit Facies ejus, sicut Sol: Vestimenta autem ejus facta sunt alba sicut Nix.* Matth. 17. 2. Splendor solaris est indicium Visionis Beatificæ niveus candor totius Vestis tegentis corpus, designat Charitatis ab omni macula & obfuscatione puritatem, quâ Anima tanquam stola Gloriæ induitur. Considera ergo, quantum sit gaudium clarè videre DEVM, & perfectissimè ac purissimè amare. Hoc gaudium in hac vita prælibare constanter potes: tantum, ut etiam velis, constanter tibi procurandam claram Cognitionem, & sincerum Amorem DEI, expertem omnis peccati, & maculæ.

PUNCT. III. *Et ecce apparuerunt illis Moyses & Elias, cum eo loquentes.* Matth. v. 3. *Et dicebant excessus illius* (quo excessus ex hac nostra vita, & excessus illius Charitatis designatur, quâ majorem nemo habet quàm qui ponebat Animam pro amicis & inimicis suis

fuis) *Quem completurus erat in Jerusalem.* Luc. 9. v. 31. Sciebant enim, Christum desiderio desiderantem, complere illum in Jerusalem, de nulla alia re libentius & jucundius collocuturum. De hoc ergo frequenter meditare, & colloquere cum Christo; si enim ipsi, dum adhuc passibilis erat, de eo, adhuc peragendo & perpetiando, jucundum fuit audire, & colloqui; quàm gratum erit audire & colloqui de eo jam peracto? Et quàm inde cor tuum ardens erit in via, sicut duorum Discipulorum, euntium in Emmaus, & de eodem argumento cum Christo colloquentium? Stude etiam talia, & tam Sancta Colloquia inter homines instituire, qualia vides institui ab hominibus Beatis in Gloria Cælesti; & cavere ea, quorum illi nollent esse Auditores, vel Collocutores.

## MEDITATIO CCCXIV.

### *Continuatio ejusdem Historiæ.*

**PUNCTUM I.** Respondens autem Petrus dixit ad *IESUM*: Domine bonum est, nos hîc esse: si vis, faciamus hic tria tabernacula, Tibi unum, Moysi unum, & Elia unum. Matth. 17. v. 4. Addit S. Lucas c. 9. v. 33. *Nesciens, quid diceret.* Considera, quàm desiderium Petri manendi semper in monte Thabor, & contemplandi Christum Gloriosum, fuerit alienum à Vocatione S. Petri: ipse enim vocatus erat ad eundum in universam terram, & ad Conversionem Animarum, ad pascendas Oves Christi. Sic qui vocati sunt ad inserviendum Proximo per ministeria sive Spiritualia, sive temporalia, Vocationi suæ non satisfacerent, si perpetuò

P

petuò